

CAMPIDONIA, VVLGO KEMPTEN.



CAMPIDONIA, peruetustum Germaniæ oppidum, quod ante Christum natum, appellatum fuit, vt aliqui scribunt, Vermeta, deinde Tretica, tertio Vertica, & vltimo Campidonia. Habuit etiam vetustum castrum mōtanum, Hyllamont appellatum, quod olim inhabitārent quidam Duces Sueuiæ, præsertim Esnerius, qui ad fidem CHRISTI fuit conuersus. Deinde post eum, atq; ex semine eius nati sunt, Dux Gotfridus, Dux Hebingus, Nebus, lmanus, Hildprandus, qui potens factus est in Sueuia & Ylgeroia. Sustulit ille ex Regarde vxore sua, natione Bauara, in monte Andex, filium, Vlrichum nomine, qui postea factus fuit Episcopus Lausanensis; & filiam, nomine Hyldegardim, quæ nupsit Carolo Magno, genuitque ei quatuor filios, Carolum, Pipinum, Lotharium, Ludouicum, & quatuor filias, Getrudim, Gyselam, Bertham & Hilddegardim. Habitauit dictus Hildprandus, aliquando in Ardex, aliquando iuxta Rauenispurgum, in monte S. Viti; aliquando in Hyllamont, prope Capidoniam, & filia eius Hildegardis, cōsentiente marito, Carolo Magno, fundauit Monasterium Capiduense, contulitque eidem comitatum Hyllamont, cum multis priuilegijs. Cæterum arx Hyllamont, nostro tempore est diruta, vocaturque Burghalden, & est præruptus collis, mœnijs ciuitatis inclusus, cuius summitas magnam habet planiciem, quæ aliquot fortalitijs est munita, paterque inde liber prospectus in omnem regionem. Ylerus quoque piscosus fluuius, alluit radicem huius collis, atque mœnia ciuitatis. Est proinde in memorato monasterio Campidonensi sepulta dicta imperatrix Hildegardis, Anno Christi 783. Et primus huius monasterij Abbas fuit appellatus Amelgarius, aut potius Andegarius, vt habet fundatio. Postea assecuti sunt Abbates titulum principum, atque inter quatuor Abbates imperij, numerati. Oppidum verò Campidonense, longè postea imperio est subditum. Est autem satis benè munitum, habens populum bellicosum, paranturque ibi cultri optimi, multæ telæ, albi & cærulei coloris. Sciendum quoque, Hildegardi fuisse sororem, nomine Adelindim, quam duxit vxorem, Otto Comes de Kesselberg, cuius habitatio fuit in Blanckenthal, prope Biberach, quæ Adelindis, post sui mariti mortem, fundauit monasterium Buchavv, quod situm est iuxta Buchamensem lacum, non procul in Biberaco, in quod recipiuntur tantum puellæ comitissæ & liberæ, possuntque pro voluntate egredi & nubere maritis. Quomodo autem Hildegardis, fauore & consensu Caroli Magni mariti sui, fundauerit monasterium Campidonense, atq; dotauerit comitatu Hyllamont, ostendunt literæ foundationis eiusdem monasterij, quæ adhuc in suo originali extant, mihi que legendæ exhibitæ sunt ab illustrissimo D. VVolfgango à Greimenstein, eiusdem monasterij Abbate. Certè, vt verū fatear, vetustiores literas ego in vita mea non vidi. Sonat autem fundatio in hunc modum. In nomine sanctæ & indiuiduæ Trinitatis, Carolus diuina fauente clementia, Imperator Augustus. Si sanctam Dei Ecclesiam digno magnitudinis nostræ munere sublimare, augmentare, atque subuenire, ad æternam nostram remunerationem, & Regni nostri stabilitatem prodesse confidimus, ideoque nouerit omnium sanctæ Dei Ecclesiæ fidelium, nostrorumque, præsentium scilicet, & futurorum solers industria, qualiter nos ob interuentum sanctiss. patris nostri Adriani Papæ, ac supplicem rogatum dilectæ coniugis nostræ Hildegardis, nec non propter nobilem ac fidelem famulatum Ioannis Augiensis, & S. Galli, reuerendi Abbatis, eiusdemque Episcopi Constantiæsis precem, ob meritum Rudangi Merensis Episcopi, & Sturmii VVuldensis Abbatis, seu cæterorum principum innumerabilium, nobis assistensium, Andegarium quendam nobilem, magnæ religionis virum, & primum Campidonensis cœnobij, ad regularem disciplinam instructorem, assumpsimus, & in eodem loco Campidonensi, qui ab eodem in honorem sanctæ Dei genitricis Mariæ, constitutus est, in pago Ylgergevv, Abbatem eum confirmauimus, & à Papa Adriano in sancto die Paschæ consecratum, preciosisssimis sanctorum martyrum, Gordiani, & Epimachi, corporibus donatum, in suam Abbatiam honestè transmisiimus. Sed quoniam prædicta coniunx nostra, in eodem cœnobio, locum sepulturæ se habituram ordinauit, diuersis muneribus ditando, quicquid in pago Ylgergavve, & Augusgavve, & Albgavve materna hæreditate legitimè obtinuit, cum nostra potestatiua manu, & imperiali largitione illuc tradidit, & in proprium ius eiusdem monasterij transfudit, & perpetualiter possidendum, sicut in alio breui continetur, donauit. Nos igitur eundem locum, vtpote de nostro & in nostro fundatum, ac fundatum, in nostro nostrorumque successorum mundiburdio, siue defensione fore constituentes per nostræ autoritatis munitionem confirmamus, & præcipimus, vt nullus publicus Iudex, neque Dux, neque Comes, aut quislibet ex iudiciaria potestate, villas, curias, aut loca, vel agros, seu reliquas possessiones, memorato monasterio, præsentis tempore subiacentes, &c. & in fine sic concluditur. Quod vt verius credatur, & omni tempore incorruptum habeatur, manu propria roborantes, sigilli nostri impressione iussimus insigniri. Hæc & alia plura in sua Cosmographia Munsterus.